

U decembru 2010. godine obilježili smo stogodišnjicu od izlaska prvog broja *Muallima*. Taj značajni jubilej za Udruženje ilmije Bosne i Hercegovine, ali i za Islamsku zajednicu u cjelini, egzemplarno je svjedočio o stoljetnom kontinuitetu i kvalitetu muslimanskog mišljenja u Bosni i Hercegovini. Pedeseti, jubilarni broj časopisa *Novi Muallim*, daje nam za pravo da pred našom javnošću i čitateljstvom potvrdimo ustrajnost i principijelnost ove generacije uleme u promicanju onih istih ideala i ciljeva koje su kao svoju misijsku zadaću istakli osnivači Udruženja ilmije i časopisa *Muallim*. Naša opredjeljenost i nastojanja da bosankohercegovačkoj ulemi, ali i široj čitateljskoj javnosti, časopis *Novi Muallim* učinimo referentnim i aktuelnim glasilom koji će pratiti život i izazove koje sa sobom nosi vidljiva su iz koncepcije samog lista, tema koje obrađujemo i autora koji u njemu objavljuju.

U rubrici *Forum* razgovarali smo o najaktuelnijim pitanjima i dilemama sa kojima se susrećemo u našem svakodnevnom imamsko-muallimskom pozivu. Razgovarali smo o tome kakav je uistinu normativno-pravni status imama u Ustavu Islamske zajednice, istraživali smo realne potrebe pravovremenog i stručnog planiranja kadrova u Islamskoj zajednici, diskutirali smo o osmišljenom i sinhroniziranom medijskom nastupu imama u elektronskim medijima, sučeljavali smo argumente o brojnim drugim bitnim pitanjima o kojima često predugo i neodgovorno šutimo. Nismo propustili priliku da kompetentno progovorimo o dešavanjima u arapskom svijetu, kolokvijalno nazvanim “arapsko proljeće”, pružili smo priliku istaknutim muslimanskim intelektualcima da se kritički osvrnu na mogućnosti svrsishodnijeg djelovanja žene muslimanke u Islamskoj zajednici. Nismo gubili iz vida ni globalnu perspektivu u kojoj promišljaju i djeluju najistaknutiji muslimanski intelektualci današnjice. Pored ostalih, intervjuisali smo briljantne reformatore, filozofe, mislioce, poput Tarika Ramadana, Ebu Hamida Ahmeda Ebu Sulejmana, Iana Almonda...

Pred vama je pedeseti broj *Novog Muallima* u kome vam posebno preporučujemo intervju sa profesorom Hilmom Neimarlijom. Intervjuom smo pokušali da, koliko-toliko, razmrsimo prilično zamršenu i haotičnu društveno-političku scenu na kojoj se neizostavno pojavljuje i Islamska zajednica.

Najveće priznanje našem radu je činjenica da u časopisu svoje tekstove potpisuje veliki broj imama. Zahvaljujemo se našim brojnim saradnicima i prijateljima bez čije pomoći *Novi Muallim* ne bi bio to što danas jeste.

Meho ŠLJIVO